
BOSNA I HERCEGOVINA
Federacija Bosne i Hercegovine
KANTON SARAJEVO
GRAD SARAJEVO
GRADONAČELNIK



Grad Sarajevo
City of Sarajevo

BOSNIA AND HERZEGOVINA
Federation of Bosnia and Herzegovina
CANTON OF SARAJEVO
CITY OF SARAJEVO
MAYOR

**ODLUKA O PLATAMA I NAKNADAMA
U ORGANIMA GRADA SARAJEVA
(Prijedlog)**

**Predlagač: Administrativna komisija Gradskog vijeća
Gradonačelnik Grada Sarajeva
Obradivač: Gradska služba za opću upravu**

Sarajevo, septembar 2017. godine

Adresa: Hamdije Kreševljakovića 3, 71000 Sarajevo, Bosna i Hercegovina
Tel: +387 33 208 340, +387 33 443 050; **Fax:** +387 33 208 341
e-mail: grad@sarajevo.ba; **web:** www.sarajevo.ba



EYOF 2019
Sarajevo & East Sarajevo

Na osnovu člana 60. Zakona o platama i naknadama u organima vlasti Federacije Bosne i Hercegovine ("Službene novine Federacije BiH", br: 45/10, 111/12 i 20/17) i člana 26. stav 1. tačka 2. Statuta Grada Sarajeva ("Službene novine Kantona Sarajevo", broj: 34/08 - prečišćeni tekst), Gradsko vijeće Grada Sarajeva, na sjednici održanoj _____, donijelo je

(Prijedlog)

ODLUKU O PLATAMA I NAKNADAMA U ORGANIMA GRADA SARAJEVA

I - OSNOVNE ODREDBE

Član 1.

(Predmet regulisanja)

(1) Ovom odlukom uređuju se: pravo, visina i uslovi za ostvarivanje novčane naknade za vršenje funkcije gradskog vijećnika i pravo na druge naknade za materijalne troškove koji nastanu u vršenju funkcije gradskog vijećnika, odnosno u vršenju dužnosti člana radnog tijela Gradskog vijeća za:

- a) gradske vijećnike u Gradskom vijeću Grada Sarajeva (u daljnjem tekstu: Gradsko vijeće) za vrijeme vršenja vijećničke dužnosti;
- b) članove radnih tijela Gradskog vijeća.

(2) Ovom odlukom uređuju se i prava iz radnog odnosa, usklađuju se plate, platni razredi i koeficijenti za obračun plate sa Zakonom o platama i naknadama u organima vlasti Federacije Bosne i Hercegovine, druga novčana primanja i prava na naknade za materijalne troškove, te druga prava i naknade za:

- a) funkcionere koje bira i imenuje Gradsko vijeće: Predsjedavajući Gradskog vijeća i zamjenici predsjedavajućeg Gradskog vijeća, Gradonačelnik i zamjenici gradonačelnika Grada Sarajeva, gradski pravobranilac i zamjenik gradskog pravobranioca (u daljnjem tekstu: funkcioneri);
- b) savjetnike koje imenuje Gradonačelnik (u daljnjem tekstu: savjetnici).

(3) Ovom odlukom usklađuju se plate i naknade državnih službenika i namještenika u organima Grada Sarajeva i Pravobranilaštvu Grada Sarajeva u skladu sa Zakonom o platama i naknadama u organima vlasti Federacije Bosne i Hercegovine.

Član 2.

(Načela)

(1) Pri određivanju iznosa plata i naknada u organima Grada Sarajeva poštuju se načela utvrđena Zakonom o platama i naknadama u organima vlasti Federacije Bosne i Hercegovine.

(2) Ista plata za isto radno mjesto: prema ovom načelu zaposleni u organima vlasti koji obavljaju poslove istog radnog mjesta, odnosno iste ili slične poslove imaju pravo na istu osnovnu platu po vrsti i stepenu stručne spreme.

Član 3.

(Budžetsko osiguranje sredstava za plate i naknade)

Finansijska sredstva za plate, naknade i druga primanja lica iz člana 1. Odluke, planiraju se i osiguravaju u budžetu Grada Sarajeva.

Član 4.

(Način utvrđivanja osnovice za plate)

(1) Osnovica za obračun plata utvrđuje se odlukom Gradskog vijeća o izvršavanju budžeta za svaku budžetsku godinu ili odlukom o privremenom finansiranju i primjenjuje se od 01.01. za svaku narednu godinu.

(2) Pored osnovice za obračun plata prilikom obračuna plate koristit će se i bod za obračun plate koji se utvrđuje odlukom Gradskog vijeća o izvršavanju budžeta za svaku budžetsku godinu ili odlukom o privremenom finansiranju i primjenjuje se od 01.01. za svaku narednu godinu.

(3) Utvrđivanje osnovice i bodova vrši se u pregovorima gradonačelnika sa sindikatom, a prije predlaganja, odnosno usvajanja odluke iz stava 1. ovoga člana.

- (4) Ukoliko se ne postigne dogovor iz stava (3) ovog člana, Gradsko vijeće će utvrditi osnovicu i bod, pri čemu visina osnovice ne može biti niža od prethodno dogovorene, odnosno važeće.
- (5) Prilikom utvrđivanja osnovice i boda za obračun plate iz stava (1) i (2) ovog člana uzet će se u obzir projekcije budžeta za narednu godinu, kao i kretanja GDP i indeksa potrošačkih cijena, a prema podacima Federalnog zavoda za statistiku.
- (6) Isplate mjesečnih novčanih primanja, izvršene u skladu sa odredbama ove odluke su definitivne i konačne.

Član 5.

(Elementi za utvrđivanje osnovne plate)

- (1) Osnovna plata utvrđuje se množenjem osnovice za platu i boda za obračun plate sa utvrđenim koeficijentom platnog razreda i tako utvrđen iznos uvećava se za 0,6 % za svaku započetu godinu penzijskog staža, a najviše do 20%.
- (2) Osnovna plata ne može biti manja od 70% prosječne neto plate isplaćene u Federaciji Bosne i Hercegovine prema posljednjem objavljenom statističkom podatku.
- (3) U slučaju da množenjem utvrđene osnovice i boda za obračun plate i pripadajućeg koeficijenta osnovna plata iznosi manje od 70% prosječne plate, zaposleniku će se isplatiti plata u navedenom postotku.
- (4) Osnovna plata obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.
- (5) Ukoliko zaposlenik radi s nepunim radnim vremenom, u skladu s posebnim zakonom ili drugim propisima, osnovna plata odredit će se srazmjerno vremenu provedenom na radu.
- (6) Puno radno vrijeme zaposlenih je 40 sati sedmično.

Član 6.

(Koeficijenti za obračun plata)

- (1) O visini koeficijenata za obračun plata iz ove Odluke odlučuje Gradsko vijeće, na prijedlog Gradonačelnika i Administrativne komisije.
- (2) Administrativna komisija utvrđuje prijedlog koeficijenata za obračun plata i naknada za gradske vijećnike, radna tijela Gradskog vijeća, funkcionere i savjetnike funkcionera.

Član 7.

(Pravo na platu prema radnom mjestu)

Funkcioner, savjetnik, državni službenik i namještenik u organima Grada Sarajeva ima pravo na platu koja odgovara funkciji, odnosno radnom mjestu na koje je postavljen u skladu sa Zakonom, gradskim propisima i provedbenima aktima.

Član 8.

(Bruto i neto plata)

- (1) Plata se u organima Grada Sarajeva utvrđuju u bruto i neto iznosu.
- (2) Plata u bruto iznosu obuhvata neto platu, poreze i doprinose.
- (3) Iznos neto i bruto plate, kao i način obračuna plate, te redovne mjesečne naknade i odbici iz plate prikazuju se na mjesečnoj platnoj listi.

Član 9.

(Isplata plata)

- (1) Plata se obračunava za jedan mjesec unatrag, a isplaćuje za prethodni mjesec, u skladu sa važećim zakonom.
- (2) Plate iz stava 1. ovog člana, kao i svaka izmjena u visini plate, utvrđuje se rješenjem koja za državne službenike i namještenike donosi Gradonačelnik i Pravobranilac za uposlene u Pravobranilaštvu Grada Sarajeva.
- (3) Funkcioneri koji dužnost obavljaju profesionalno u skladu sa Statutom Grada Sarajeva i savjetnici, imaju pravo na platu.

- (4) Plata iz stava 1. ovog člana, kao i svaka izmjena u visini plate za funkcionere utvrđuje se rješenjem Administrativne komisije.
- (5) Plata iz stava 1. ovog člana, kao i svaka izmjena u visini plate za savjetnike Gradonačelnika utvrđuje se rješenjem gradonačelnika.
- (6) Funkcioneri iz stava 3. ovog člana, pravo na platu ostvaruju stupanjem na dužnost, u skladu sa općim aktima Gradskog vijeća.
- (7) Gradonačelnik, pravo na platu ostvaruje danom imenovanja.
- (8) Savjetnici Gradonačelnika ostvaruju pravo na platu postavljanjem na radno mjesto.
- (9) Plata funkcionera koji dužnost obavlja profesionalno u skladu sa Statutom Grada Sarajeva, i savjetnika, kao i svaka izmjena u visini plate, utvrđuje se rješenjem.
- (10) Podaci o platama uposlenih u organima Grada Sarajeva su javni.

II - PLATE I NAKNADE FUNKCIONERA, SAVJETNIKA FUNKCIONERA I GRADSKIH VIJEĆNIKA U GRADU SARAJEVO

Član 10.

(Radno pravni status funkcionera)

Odluku o radno pravnom statusu Predsjedavajućeg Gradskog vijeća i zamjenika Predsjedavajućeg Gradskog vijeća donosi Gradsko vijeće na prijedlog Administrativne komisije, a na osnovu odluke Gradskog vijeća o izboru.

Član 11.

(Ostvarivanje prava iz radnog odnosa)

- (1) Funkcioneri i savjetnici prava iz radnog odnosa ostvaruju u organima Grada Sarajeva.
- (2) Administrativna komisija Gradskog vijeća donosi rješenje o zasnivanju radnog odnosa na osnovu odluke o izboru i odluke o radno pravnom statusu i to za: Predsjedavajućeg Gradskog vijeća, zamjenike Predsjedavajućeg Gradskog vijeća, Gradonačelnika Grada Sarajeva, zamjenike Gradonačelnika Grada Sarajeva, te Pravobranioca i zamjenika Pravobranioca Grada Sarajeva.
- (3) Gradonačelnik donosi rješenje o zasnivanju radnog odnosa za savjetnika Gradonačelnika.

Član 12.

(Platni razredi i koeficijenti za plate funkcionera i savjetnika)

Utvrđuju se sljedeći platni razredi i koeficijenti za plate funkcionera i savjetnika:

Platni razred	Radno mjesto	Koeficijent
I	- Gradonačelnik	9,00
II	- Predsjedavajući Gradskog vijeća	8,50
III	- Zamjenici gradonačelnika, - zamjenici Predsjedavajućeg Gradskog vijeća	8,00
IV	- Gradski pravobranilac	7,20
V	- Zamjenik gradskog pravobranioca	6,50
VI	- Savjetnik gradonačelnika	6,00

Odjeljak A. Stalna mjesečna novčana primanja gradskih vijećnika

Član 13.

(Naknade gradskim vijećnicima i članovima radnih tijela Gradskog vijeća)

- (1) Vijećnicima u Gradskom vijeću, utvrđuje se pravo na mjesečnu naknadu za rad u Gradskom vijeću, kao i naknadu troškova, odnosno izgubljene zarade, tako što se osnovica za obračun plate, utvrđena u skladu sa Zakonom, množi sa koeficijentom 2.
- (2) Članovima radnih tijela Gradskog vijeća, utvrđuje se pravo na naknadu, tako što se osnovica za obračun plate, utvrđena u skladu sa Zakonom, množi sa koeficijentom 0.30, i to za najviše dvije sjednice mjesečno po radnom tijelu.
- (3) Članovima radnih tijela koji nisu gradski vijećnici pripada naknada iz stava (2) ovog člana ukoliko po pozivu prisustvuju sjednici Gradskog vijeća, a gradskom vijećniku koji je član radnog tijela ne pripada ova naknada.
- (4) Član radnog tijela, uz uredan poziv, ima pravo na naknadu kao u stavu (2) ovoga člana.
- (5) Ukoliko gradski vijećnik ne ostvaruje po drugom osnovu, odgovarajuće socijalno osiguranje (zdravstveno i penziono), na njegov zahtjev i uz predočenu relevantnu dokumentaciju, tokom trajanja vijećničkog mandata ima pravo na refundaciju troškova socijalnog osiguranja (zdravstveno i penziono) iz sredstava Budžeta Grada Sarajeva.

Član 14.

(Isplata naknada)

Naknade iz člana 13. ove Odluke isplaćuju se mjesečno za prethodni mjesec, a na osnovu evidencije o prisustvu koju vodi Gradska Služba za Gradsko vijeće Grada Sarajeva.

Član 15.

(Umanjenje naknade zbog izostanka)

- (1) Član radnog tijela nema pravo na naknadu ukoliko izostane sa sjednice radnog tijela Gradskog vijeća.
- (2) Ukoliko, po osnovu pismenog ovlaštenja Kluba gradskog vijećnika, jedan gradski vijećnik mijenja drugoga u radu radnog tijela Gradskog vijeća, naknada pripada gradskom vijećniku koji prisustvuje sjednici radnog tijela Gradskog vijeća.
- (3) Iznos mjesečne naknade za rad u Gradskom vijeću umanjuje se za 10% za neopravdano odsustvovanje sa sjednice Gradskog vijeća.

Odjeljak B. Pravo na naknade gradskim vijećnicima, ostvarivanje prava, te druga prava funkcionera i savjetnika

Član 16.

(Pravo na naknade gradskim vijećnicima)

- (1) Gradski vijećnik, funkcioner i savjetnik ostvaruju pravo na naknadu materijalnih troškova koji proizilaze iz vršenja funkcije na koju su izabrani i pravo na naknadu troškova za službeno putovanje koji proizilaze iz vršenja funkcije na koju su izabrani ili se realizuje na osnovu odluke Gradskog vijeća kojom su određeni članovi delegacije.
- (2) Visina naknade za troškove službenog putovanja, dnevnica, naknada za smještaj, naknada za troškove prijevoza i ostale vrste naknada za službeno putovanje za gradske vijećnike, funkcionere i savjetnike, utvrđuju se na način kako je to utvrđeno za državne službenike u skladu sa važećim propisima u Federaciji Bosne i Hercegovine.
- (3) Funkcioner imenovan na funkciju u Gradskom vijeću ima pravo na prijevoz službenim putničkim automobilom.
- (4) Funkcioner imenovan na funkciju u Gradskom vijeću ima pravo na plaćene troškove službene komunikacije, informiranja, reprezentacije i druge troškove nastale iz vršenja dužnosti funkcionera imenovanog na funkciju u Gradskom vijeću.

(5) Gradski vijećnik ima pravo na pomoć za potrebe liječenja u slučaju teške bolesti u skladu s Naredbom Federalnog ministarstva zdravstva o listi teških bolesti, odnosno teških tjelesnih povreda temeljem kojih se ostvaruje naknada za slučaj teške invalidnosti ili teške bolesti ("Službene novine Federacije BiH", broj 30/05), te u slučaju smrti gradskog vijećnika, odnosno člana uže porodice gradskog vijećnika i to kako slijedi.

U slučaju povrede na radu, teške bolesti ili invalidnosti gradskog vijećnika isplaćuje se jednokratna novčana pomoć, u visini od dvije prosječne neto plate isplaćene u Federaciji Bosne i Hercegovine prema zadnjem objavljenom statističkom podatku.

(6) Utvrđivanje nastanka teške bolesti ili invalidnosti u svakom konkretnom slučaju vrši Komisija za kvalifikaciju bolesti javne zdravstvene ustanove sa kojom postoji sporazum o pružanju ove usluge organima Grada Sarajeva.

(7) Način i postupak ostvarivanja prava iz ovog člana, vrši se na način kako je to pravilnikom o platama i naknadama, u skladu sa pozitivnim propisima utvrđeno za državne službenike i namještenike.

Član 17.

(Pravo na naknade funkcionerima)

(1) Funkcionerima i savjetnicima pripada pravo na:

- naknadu plate zbog bolesti ili povreda,
- naknadu za troškove ishrane (topli obrok),
- naknadu za godišnji odmor i plaćeni dopust,
- naknadu za slučaj smrti, teške bolesti i invalidnosti,
- otpremnina,
- naknadu troškova za službeno putovanje,
- naknadu za prijevoz na posao i s posla za funkcionere koji ne ostvaruju pravo na korištenje službenog putničkog automobila.

(2) Naknade iz stava (1) ovog člana funkcioneri i savjetnici ostvaruju u skladu sa Zakonom o platama i naknadama u organima vlasti Federacije Bosne i Hercegovine ("Službene novine Federacije BiH", br. 45/10, 111/12 i 20/17).

Član 18.

(Nalogodavac za službeno putovanje)

Nalogodavac za službeno putovanje je:

Gradonačelnik za Predsjedavajućeg i zamjenike Predsjedavajućeg Gradskog vijeća i gradskog vijećnika; Gradonačelnik za Gradonačelnika, zamjenika Gradonačelnika i savjetnike Gradonačelnika, te Administrativna komisija za Pravobranioca Grada Sarajeva, a Pravobranilac za zamjenika pravobranioca Grada Sarajeva.

Član 19.

(Druga prava)

(1) Administrativna komisija Gradskog vijeća donosi akt kojim se bliže uređuje pravo i uslovi za korištenje prijevoza službenim putničkim automobilom za funkcionere, pravobranioca Grada Sarajeva i savjetnike.

(2) Administrativna komisija Gradskog vijeća donosi akte kojima se uređuju prava funkcionera, Pravobranioca i zamjenika Pravobranioca Grada Sarajeva i savjetnika, na plaćene troškove službene komunikacije, informiranja i reprezentacije.

III - PLATE I NAKNADE DRŽAVNIH SLUŽBENIKA I NAMJEŠTENIKA U ORGANIMA GRADA SARAJEVA

Odjeljak A. Platni razredi i koeficijenti za plate državnih službenika i namještenika u organima Grada Sarajeva

Član 20.

(Platni razredi i koeficijenti za plate državnih službenika u organima Grada Sarajeva)

Utvrđuju se sljedeći platni razredi i koeficijenti za plate državnih službenika Grada Sarajeva:

Platni razred	Radno mjesto	Koeficijent
I	- sekretar organa uprave - rukovodilac Stručne službe gradonačelnika	6,50
II	- sekretar Gradskog vijeća - pomoćnik Gradonačelnika	5,70
III	- interni revizor - glavni inspektor - stručni savjetnik u Pravobranilaštvu Grada Sarajeva	5,20
IV	- šef Odjeljenja - šef Kabineta	4,60
V	- šef Odsjeka	4,50
VI	- gradski inspektor	4,30
VII	- stručni savjetnik	4,10
VIII	- viši stručni saradnik	3,90
IX	- stručni saradnik	3,70

Član 21.

(Platni razredi i koeficijenti za plate namještenika)

Utvrđuju se sljedeći platni razredi i koeficijenti za plate namještenika Grada Sarajeva:

Platni razred	Radno mjesto	Koeficijent
I	- šef unutrašnje organizacione jedinice (VŠS)	3,20
II	- viši samostalni referent (VSS)	3,10
III	- viši referent (SSS) i VKV radnik	2,70
IV	- referent (SSS) i KV III i IV stepen	2,60
V	- pomoćni radnik i nekvalificirani radnik (NK radnik)	1,85

Odjeljak B. Dodaci na platu državnih službenika i namještenika

Član 22.

(Vrste dodataka na platu)

(1) Državni službenik i namještenik ima pravo na dodatak na platu po osnovu posebnih uslova rada i po osnovu naknade za prekovremeni rad.

(2) Dodatak na platu iz stava (1) ovog člana čini sastavni dio osnovne plate.

Član 23.

(Dodatak na platu po osnovu posebnih uslova rada)

- (1) Dodatak na platu po osnovu posebnih uslova rada pripada državnim službenicima koji obavljaju poslove inspektora i taj dodatak iznosi 20% do 30% od osnovne plate, što će se precizirati Pravilnikom.
- (2) Dodatak na platu za ostale poslove koji se vrše pod posebnim uslovima, određenim posebnim zakonom, može biti od 10% do 20%, što će se utvrditi posebnom odlukom.
- (3) Poseban dodatak iz stava (1) i (2) ovog člana obračunava se na osnovnu platu bez dijela plate po osnovu radnog staža i čini sastavni dio plate.

Član 24.

(Vrste naknada)

Državni službenik i namještenik ima pravo na naknade utvrđene u odredbama člana 25. do 39. ove odluke.

Član 25.

(Naknada za prekovremeni rad, rad u neradne dane, noćni rad i rad u dane državnih praznika)

- (1) U slučaju prekovremenog rada, rada u neradne dane, noćnog rada ili rada u dane državnih praznika, državni službenik i namještenik ima pravo na naknadu osnovne plate, razmjerno vremenu trajanja tog rada, uvećanom za postotak utvrđen kolektivnim ugovorom.
- (2) Visina naknade i uslovi za ostvarivanje naknade utvrđuju se pravilnikom o platama i naknadama, u skladu sa kolektivnim ugovorom.
- (3) Obračun naknade iz stava (1). ovog člana, vrši se od osnovne plate, bez dijela plate po osnovu penzijskog staža. Naknada iz ovog člana čini sastavni dio plate.

Član 26.

(Vrste naknada)

Državni službenik i namještenik ima pravo na sljedeće naknade koje nemaju karakter plate:

- naknada za ishranu tokom rada - topli obrok;
- naknada za prijevoz na posao i s posla;
- naknada na ime korištenja godišnjeg odmora - regres;
- naknada za službeno putovanje;
- naknada za bolovanje;
- naknada za slučaj povrede na radu, teške bolesti i invalidnosti;
- naknada za slučaj smrti i pravo na osiguranje od posljedica nesretnog slučaja;
- naknada za porodijski dopust;
- plaćeni dopust;
- naknada za rad u komisijama koje se održavaju poslije isteka radnog vremena;
- otpremnina;
- naknada u slučaju prekobrojnosti.

Član 27.

(Naknada za ishranu tokom rada)

Državni službenik i namještenik ima pravo na novčanu naknadu za ishranu u toku rada (topli obrok), u visini 1% prosječne neto plate isplaćene u Federaciji Bosne i Hercegovine po zadnjem statističkom podatku. Naknada se neće obračunavati za vrijeme odsutnosti s posla.

Član 28.

(Naknada za prijevoz na posao i s posla)

- (1) Državnom službeniku i namješteniku kome nije organizovan službeni prijevoz na posao i s posla, čije je mjesto stanovanja udaljeno najmanje 2 km od mjesta rada, pripada naknada za troškove prijevoza, u visini mjesečne karte gradskog, prigradskog i međugradskog saobraćaja.

(2) U međugradski saobraćaj spadaju mjesta koja su udaljena od mjesta rada do 70 km.

Član 29.

(Regres za godišnji odmor)

Državni službenik i namještenik ima pravo na naknadu na ime regresa za korištenje godišnjeg odmora u visini 50% prosječne neto plate isplaćene u Federaciji Bosne i Hercegovine po zadnjem objavljenom statističkom podatku. Pravo na regres ima svaki državni službenik i namještenik koji je u toku tekuće kalendarske godine ostvario pravo na godišnji odmor.

Član 30.

(Naknada za službeno putovanje)

(1) Državni službenik i namještenik ima pravo na naknadu za troškove službenog putovanja na području Federacije Bosne i Hercegovine, odnosno Bosne i Hercegovine, kao i za putovanja u inostranstvo, na koje se upućuje radi obavljanja službenih poslova i zadataka

(2) Visina i način ostvarivanja naknade iz stava (1) ovog člana utvrđuje se pravilnikom u skladu sa pozitivnim propisima i kolektivnim ugovorom.

Član 31.

(Naknada za bolovanje)

(1) Državni službenik i namještenik ima pravo na naknadu plate za vrijeme privremene spriječenosti za rad (bolovanje) do 42 kalendarska dana u visini njegove neto plate isplaćene za prethodni mjesec.

(2) Naknada plate za bolovanje preko 42 dana iz stava (1) ovog člana ostvaruje se po propisu Kantona Sarajevo kojim se uređuje naknada za ovo bolovanje, s tim da razliku do pune plate isplaćuje poslodavac.

Član 32.

(Naknada za slučaj povrede na radu, teške bolesti i invalidnosti)

(1) U slučaju povrede na radu, teške bolesti ili invalidnosti državnog službenika i namještenika ili člana njegove uže porodice isplaćuje se jednokratna novčana pomoć, u visini od dvije prosječne neto plate isplaćene u Federaciji Bosne i Hercegovine prema zadnjem objavljenom statističkom podatku.

(2) Utvrđivanje nastanka teške bolesti ili invalidnosti u svakom konkretnom slučaju vrši Komisija za kvalifikaciju bolesti javne zdravstvene ustanove sa kojom postoji sporazum o pružanju ove usluge.

(3) Način i postupak ostvarivanja prava iz stava (1) i (2) ovog člana, utvrđuje se pravilnikom o platama i naknadama, u skladu sa pozitivnim propisima.

Član 33.

(Naknada za slučaj smrti i pravo na osiguranje od posljedica nesretnog slučaja)

(1) U slučaju smrti državnog službenika, odnosno namještenika njegovoj porodici se isplaćuju troškovi sahrane u visini od četiri prosječne neto plate isplaćene u Federaciji Bosne i Hercegovine prema zadnjem objavljenom statističkom podatku.

(2) Naknada iz stava (1) ovog člana isplaćuje se državom službeniku, odnosno namješteniku, i u slučaju smrti člana uže porodice državnog službenika ili namještenika.

(3) Ukoliko u organima uprave Grada Sarajeva rade dva ili više članova porodice, troškovi sahrane iz stava (1) ovog člana isplaćuju se samo jednom zaposlenom članu porodice.

(4) Državni službenik i namještenik ima pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa.

(5) Visina osiguranja po ovom osnovu određuje se prema polici osiguranja od posljedica nesretnog slučaja odnosno polici osiguranja od prirodne smrti.

(6) Ugovor o osiguranju sa odgovarajućom osiguravajućom kućom zaključuje gradonačelnik za sve funkcionere, državne službenike i namještenike zaposlene u organima uprave Grada Sarajeva i Pravobranilaštvu Grada Sarajeva, u skladu sa Kolektivnim ugovorom.

Član 34.

(Definicija člana uže porodice)

Članom uže porodice državnog službenika ili namještenika, u smislu čl. 32. i 33. ove Odluke smatraju se: bračni i vanbračni drug ako žive u zajedničkom domaćinstvu; dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina, odnosno, do 26 godina starosti ako se nalaze na redovnom školovanju i nisu u radnom odnosu, a djeca nesposobna za rad, bez obzira na starosnu dob); roditelji (otac, majka, očuh, maćeha i usvojitelji); braća i sestre bez roditelja do 18 godina, odnosno, do 26 godina starosti ako se nalaze na redovnom školovanju i nemaju drugih prihoda, već ih korisnik naknade stvarno izdržava, ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, pod uslovom da s njima žive u zajedničkom domaćinstvu i unučad ako nemaju roditelja i žive u zajedničkom domaćinstvu s državnim službenikom ili namještenikom.

Član 35.

(Naknada za porodiljsko odsustvo)

Državni službenik i namještenik, za vrijeme porodiljskog odsustva, ima pravo na naknadu plate prema propisima Kantona kojim se uređuje ova oblast, prema mjestu uplate doprinosa, s tim da se razlika do visine pune plate, kao i pripadajući porezi i doprinosi, isplaćuju iz Budžeta Grada Sarajeva.

Član 36.

(Plaćeni dopust)

- (1) Državni službenik i namještenik ima pravo na naknadu plate i to u visini svoje neto plate iz prethodnog mjeseca, za vrijeme korištenja plaćenog dopusta, koji traje do 30 dana.
- (2) Način i postupak ostvarivanja prava iz stava (1) ovog člana, utvrđuje se pravilnikom o platama i naknadama, u skladu sa pozitivnim propisima.

Član 37.

(Naknada za rad u komisijama)

- (1) Državni službenici i namještenici, kao članovi komisija koje se formiraju na osnovu rješenja gradonačelnika imaju pravo na maksimalnu mjesečnu naknadu za rad u komisijama, a čije osnivanje je predviđeno zakonom, i to do visine jedne i pol (1,5) osnovice iz člana 4. ove odluke, a koje se održavaju poslije isteka radnog vremena.
- (2) Visina naknade, iz stava (1) ovog člana, utvrđuje se rješenjem o formiranju komisije.

Član 38.

(Otpremnina)

Državni službenik i namještenik ima pravo na otpremninu pri odlasku u penziju u visini svojih pet ostvarenih prosječnih neto plata isplaćenih u prethodnih pet mjeseci.

Član 39.

(Naknada u slučaju prekobrojnosti)

U slučaju prestanka radnog odnosa državnog službenika odnosno namještenika, zbog prekobrojnosti, taj državni službenik, odnosno namještenik, ima pravo na naknadu i to:

- za radni staž do 10 godina, u visini tri neto plate državnog službenika odnosno namještenika,
- za radni staž od 11 do 30 godina, u visini šest neto plata državnog službenika odnosno namještenika,
- za radni staž preko 30 godina, u visini deset neto plata državnog službenika odnosno namještenika.

IV - PLATE PRIPRAVNIKA I NAKNADE VOLONTERA

Član 40.

(Visina plate za pripravnike)

(1) Plata pripravnika visoke, više i srednje stručne spreme utvrđuje se u iznosu, i to

- za visoku školsku spremu u iznosu od 80% od početne osnovne plate utvrđene za radno mjesto stručnog saradnika
- za višu školsku spremu u iznosu od 80% od početne osnovne plate utvrđene za radno mjesto samostalnog referenta
- za srednju školsku spremu u iznosu od 80% od početne osnovne plate utvrđene za radno mjesto referenta

(2) Plata iz stava (1) ovog člana predstavlja dio osnovne plate, bez dijela plate koji se obračunava po osnovu penzijskog staža.

Član 41.

(Visina naknade za volontere)

(1) Volonteri visoke, više i srednje stručne spreme imaju pravo na naknadu, i to:

- za visoku školsku spremu u iznosu od 35% od osnovne plate stručnog saradnika
- za višu školsku spremu u iznosu od 35% od osnovne plate samostalnog referenta
- za srednju školsku spremu u iznosu od 35% od osnovne plate referenta

(2) Visina naknade iz stava (1) ovog člana određuje se od osnovne plate odgovarajuće školske spreme.

V - ZAVRŠNE ODREDBE

Član 42.

(Neposredna primjena Zakona i kolektivnog ugovora)

Na sva pitanja iz oblasti plata i naknada koja nisu regulisana ovom Odlukom, neposredno će se primjenjivati odredbe zakona i kolektivnog ugovora.

Član 43.

(Prestanak primjene propisa)

Stupanjem na snagu ove odluke prestaje da važi Odluka o platama i naknadama u organima Grada Sarajeva ("Službene novine Kantona Sarajevo", b. 9/16, 3/17 i 25/17)

Član 44.

(Izmjene i dopune Odluke)

Izmjene i dopune Odluke vrše se na način i po postupku za njeno donošenje.

Član 45.

(Ravnopravnost spolova)

Odredbe ove Odluke odnose se podjednako na lica muškog i ženskog spola, bez obzira na rod imenice upotrijebljen u tekstu Odluke.

Član 46.

(Stupanje na snagu)

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

**PREDSJEDAVAJUĆI GRADSKOG VIJEĆA
GRADA SARAJEVA**

Broj:

Sarajevo, _____.____. 2017.g.

Igor dr. Gavrić

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 60. stav 1. Zakona o platama i naknadama u organima vlasti Federacije Bosne i Hercegovine ("Službene novine Federacije BiH", br. 45/10, 111/12 i 20/17), kojim je, između ostalog propisano da se koeficijenti i platni razredi uposlenih u organima vlasti kantona, općine i grada, utvrđuju zakonom o plaćama i naknadama uposlenih u organima vlasti kantona, odnosno odlukama gradskih i općinskih vijeća o plaćama i naknadama uposlenih u općinskim, odnosno gradskim organima vlasti. Odredbom stava 2. istog člana navedenog Zakona utvrđeno je da će se zakonom o plaćama i naknadama uposlenih u organima vlasti kantona, odnosno odlukama gradskih i općinskih vijeća o plaćama i naknadama uposlenih u općinskim, odnosno gradskim organima vlasti, propisati i koeficijenti za izabrane dužnosnike, nositelje izvršnih funkcija i savjetnike u kantonalnim, gradskim i općinskim organima vlasti, s tim da se ne mogu utvrditi veći koeficijenti od koeficijenata utvrđenih za izabrane dužnosnike, nositelje izvršnih funkcija, savjetnike i uposlene u Federalnim organima. Pravni osnov također je sadržan i u članu 26. stav 1. tačka 2. Statuta Grada Sarajeva, kojim je propisano da Gradsko vijeće donosi odluke, druge propise i opće akte i daje njihovo tumačenje.

RAZLOZI DONOŠENJA

Gradsko vijeće Grada Sarajeva, na sjednici od 28.06.2017.g. donijelo je Odluku o organizaciji i djelokrugu organa uprave Grada Sarajeva. Navedenom Odlukom u skladu sa važećim zakonskim propisima, na drugačiji način organizovan je jedinstveni gradski organ uprave u kojem djeluju gradske službe za upravu kao gradski organi uprave, utvrđuje njihov djelokrug, rukovođenje i uređuju druga pitanja od značaja za njihovo organizovanje i funkcionisanje. Navedeno zahtjeva da se važeća Odluka o platama i naknadama u organima Grada Sarajeva ("Službene novine Kantona Sarajevo", br. 9/16, 3/17 i 25/17) uskladi sa odredbama donesene Odluke o organizaciji i djelokrugu organa uprave Grada Sarajeva poštujući odredbe Zakona o platama i naknadama u organima vlasti Federacije Bosne i Hercegovine.

Pored gore navedenog, razlog za donošenje nove Odluke o platama i naknadama u organima Grada Sarajeva je i taj što se ova odluka sa donošenjem izmjenjena i dopuna Zakona o platama i naknadama u organima vlasti Federacije Bosne i Hercegovine usklađivala sa navedenim izmjenama i dopunama dva puta. Ove izmjene i dopune su sada inkorporirane u novu odluku.

Obzirom na prednje izloženo Gradsko vijeće Grada Sarajeva donijelo je ovu odluku.

OBRAZLOŽENJE PREDLOŽENIH RJEŠENJA

U POGLAVLJU I - OSNOVNE ODREDBE u članu 1. do 9. propisano je sljedeće: predmet regulisanja, načela, budžetsko osiguranje sredstava za plate i naknade, način utvrđivanja osnovice za plate, elementi za utvrđivanje osnovne plate, koeficijenti za obračun plata, pravo na platu prema radnom mjestu, bruto i neto plata, isplata plata

U POGLAVLJU II - PLATE I NAKNADE FUNKCIONERA, SAVJETNIKA FUNKCIONERA I GRADSKIH VIJEĆNIKA U GRADU SARAJEVO u članu 10. do 19. propisano je sljedeće: radno pravni status funkcionera, ostvarivanje prava iz radnog odnosa, platni razredi i koeficijenti za plate funkcionera i savjetnika, naknade gradskim vijećnicima i članovima radnih tijela Gradskog vijeća, isplata naknada, umanjenje naknade zbog izostanka, pravo na naknade gradskim vijećnicima, pravo na naknade funkcionerima, nalogodavac za službeno putovanje, druga prava.

U POGLAVLJU III - PLATE I NAKNADE DRŽAVNIH SLUŽBENIKA I NAMJEŠTENIKA U ORGANIMA GRADA SARAJEVA u članu 20. do 39. propisano je sljedeće: platni razredi i koeficijenti za plate državnih službenika u organima Grada Sarajeva, platni razredi i koeficijenti za plate namještenika, vrste dodataka na platu, dodatak na platu po osnovu posebnih uslova rada, vrste naknada, naknada za prekovremeni rad, rad u neradne dane, noćni rad i rad u dane državnih praznika, vrste naknada, naknada za ishranu tokom

rada, naknada za prijevoz na posao i s posla, regres za godišnji odmor, naknada za službeno putovanje, naknada za bolovanje, naknada za slučaj povrede na radu, teške bolesti i invalidnosti, naknada za slučaj smrti i pravo na osiguranje od posljedica nesretnog slučaja, definicija člana uže porodice, naknada za porodijsko odsustvo, plaćeni dopust, naknada za rad u komisijama, otpremnina, naknada u slučaju prekobrojnosti.

U POGLAVLJU IV - PLATE PRIPRAVNIKA I NAKNADE VOLONTERA u članu 40. do 41. propisano je sljedeće: visina plate za pripravnike, visina naknade za volontere.

U POGLAVLJU V - ZAVRŠNE ODREDBE u članu 42. do 46. propisano je sljedeće: neposredna primjena Zakona i kolektivnog ugovora, prestanak primjene propisa, izmjene i dopune Odluke, ravnopravnost spolova i stupanje na snagu.

FINANSIJSKA SREDSTVA

Finansijska sredstva za realizaciju ove odluke obezbjeđuju se u budžetu Grada Sarajeva.